

दिनांक : 18.01.2026

समय : 18.45 बजे

प्रादेशिक समाचार

- लोकसभा अध्यक्ष ओम बिरला कह्यो— केन्द्र अर राज्य सरकार किसानां रे हित खातिर लगोतार काम कर री है।
- केन्द्र सरकार विकसित भारत —जी राम जी कानून माथे सोशल मीडिया माथे कर्या जा रह्या न्यारा—न्यारा दावां ने भ्रामक बतायो— कह्यो— मजूरां री न्यूनतम मजदूरी कम नी व्हेला।
- मौनी अमावस्या माथे प्रदेशभर मांय तीर्थ स्थलां माथे खास आयोजन व्हिया—श्रिद्धालू स्नान कर दान—पुन कर्यो।

अर

- राज्य मांय लारला चौबीस घंटां मांय घणखर ठौड़ां माथे तापमान बधने सूं लोगां ने तेज ठण्ड अर शीतलहर सूं राहत मिळी।

000

लोकसभा अध्यक्ष ओम बिरला कह्या है के देश, विकसित भारत बणणे री ओर तेजी सूं बध रह्यो है। सवाईमाधोपुर मांय आज सूं दो दिवसीय अमरुद महोत्सव अर कृषि तकनीक मेळे री सरूआत व्ही। श्री बिरला कह्यो की केन्द्र सरकार किसानां री भलाई रे खातिर काम कर री है। वठिने काशतकारां री आय मांय भी लगोतार बढोतरी हो री है।

.....

लोकसभा अध्यक्ष ओम बिरला प्रदर्शनी स्थल माथे लगी स्टॉल्स रो जायजो कर काशतकारां सूं बणतल भी करी। कृषि मंत्री डॉ. किरोडी लाल मीणा खबरनवीसां सूं बणतल करता थकां कह्यो की मेळे रे चालता कृषि अर उद्यानिकी री नुवी तकनीकां अर प्रसंस्करण संबंधी केई आयोजन व्हेला। वणा बत्ती ऊं बत्ती काशतकारां सूं सहभागिता री अरज करी। कृषि मंत्री कह्यो के ज़िले मांय अमरुद री बड़े पैमाने माथे खेती होवे है। ऐडा में अठे 150 करोड रिप्यां री लागत सूं अमरुद प्रोसेसिंग यूनिट लगाई जावेली। महोत्सव मांय भेळा होवण वाळा मलारना डूंगर रा भूखा गांव रा काशतकार प्रोसेसिंग यूनिट लगाये जावण रे फैसले माथे खुशी जताता थकां कह्यो के इण सूं अमरुद उत्पादक काशतकारां ने फायदो व्हेला।

000

केन्द्र सरकार सोशल मीडिया माथे प्रसारित हो रिया इण वीडियो रो खंडन कर्यो है जिण मांय दावो कर्यो गयो है कि विकसित भारत —जी राम जी रे तैत न्यूनतम मजदूरी रो तैय नी कर्यो जावेली। पत्र सूचना कार्यालय —पीआईबी री तथ्य जांच इकाई बतायो है कि ओ दावो भ्रामक है। इकाई कह्यो की मजूरां ने दी जावण वाळी मजदूरी मांय कोई कमी नी करी जावेली अर रोजगार री कानूनी गारंटी पैले री तरह ही जारी रहवेली। पीआईबी ने नागरिकां सूं सटीक जाणकारी रे खातिर सदा ही आधिकारिक स्रोतां माथे भरोसो करणे री अरज करी है। इण बीच भाजपा प्रदेश अध्यक्ष मदन राठौड़ विकसित भारत जी राम जी कानून ने ले र विपख माथे भ्रम फैलाणे रो आरोप माण्ड्यो है। वणा पाली मांय खबरनवीसां सूं बणतल करता थकां कह्यो की इण योजना रे तैत 125 दिन रोजगार दियो जावेली।

000

राज्य विधानसभा रा 28 फरवरी सूं शुरू हो रिया बजट सत्र ने ले र आज विधानसभा अध्यक्ष वासुदेव देवनानी जयपुर मांय प्रेस वार्ता करी। वणा कह्यो कि 16वीं विधानसभा रे पांचवे सत्र मांय

राष्ट्रीय परीक्षण एजेंसी-एनटीए ने जेईई (मेन) 2026 रे पहले सत्र री परीक्षा खातिर प्रवेश पत्र जारी कर दिया है। 21 सून 24 जनवरी रे बीच परीक्षा देवण वाळा पढेसरी आधिकारिक वेबसाइट रममण्डपद डॉट दज डॉट दपब डॉट पद माथे आप रो एडमिट कार्ड डाउनलोड कर सके है।

000

भारतीय जनता पार्टी रे राष्ट्रीय अध्यक्ष पद रे चुणाव खातिर काले सून नामांकन दाखिल कर्या जावेला। पार्टी रा रिटर्निंग अहलकार के. लक्ष्मण चुनाव कार्यक्रम जारी कर्यो। इण रे खातिर नामांकन दोपहरां 2 बज्यां सून 4 बज्यां ताई दाखिल कर्या जा सके है। नामांकन पानां री जांच सुवांरे 4 सून 5 बज्यां ताई व्हेली अर नामांकन पाछो लेणे री प्रक्रिया शाम 6 बज्यां ताई रहवेली। इण प्रक्रिया रे पाछे मंगलवार ने मतदान व्हेला। भाजपा प्रदेश अध्यक्ष मदन राठौड रे हुकम माथे राष्ट्रीय अध्यक्ष पद रे चुणाव रे खातिर राजस्थान सून प्रस्तावकां री सूची जारी करी ज्यी। सूची मांय मुख्यमंत्री भजन लाल शर्मा, प्रदेश अध्यक्ष मदन राठौड समेत 20 नेतावां रा नाम भेळा है।

000

राष्ट्रमंडल देशां री संसदां रे अध्यक्ष अर पीठासीन अधिकारियां रे 28 वे सम्मेलन पाछे जयपुर आया अंतरराष्ट्रीय प्रतिनिधिमंडल प्रदेश रे समृद्ध अर अर अद्वितीय इतिहास री सराहना की। दो दिन रे प्रवास रे मौके प्रतिनिधि मण्डल पर्यटन स्थलां रो दौरा कर्यो। ओ प्रतिनिधि मण्डल आज पाछो लौट ग्यो।

000

पाली मांय राष्ट्रीय सेवा योजना रे तैत चाल रिया सात दिवसीय शिविर रे पांचवे दिन न्यारा-न्यारा कार्यक्रम राख्या गया। राजकीय कन्या महाविद्यालय री कानी सून मानपुरा भाकरी अर कीरो री ढाणी मांय केंद्र अर राज्य सरकार री न्यारी-न्यारी जनकल्याणकारी योजनावां रे साथै रैली निकाली ज्यी। इण मौके माथे लोगां ने जनकल्याणकारी योजनावां रे उद्देश्य, पात्रता अर आवेदन री जाणकारी दीनी। कलाकार नशा मुक्ति ने ले र नुक्कड़ नाटक रो प्रदर्शन भी कर्यो। इण रे चालता युवावां ने नशो नी करणे री शपथ भी दिलायी जी।

000